



OSTALO JE U SJEĆANJU

Popravljao je staru Češku vekericu, a nije ni znao da će mu ona otkucati zadnje minute njegovog života. „Ženo, evo napravih je konačno, radi sama“.

Samo što reče naš dobri SAHAJDŽIJA, a sa ulaznih vrata prolomi se glas: „POLAZI BALIJO“!!!

„Pa stanite gdje ću. Ja nisam nikome kriv. Ja sam SAHAJDŽIJA“.

Udari ga skot kundakom u čelo, a drugi ga izgura s vrata u kombi crvene boje, pričale su poslije komšije.

Evo i danas prisjećanje, tuga, bol u grudima, jecaji i opet evo 24. april. 2010 godine. I nebo danas plače. Cijeli dan kiša pada slijevajući se niz lica zajedno sa suzama svih prisutnih, ispračajući 34 tabuta nevinih žrtava Vlasenice. Sablasna tišina koja stvara ambijent isti onakav kao što je bio i April 1992 godine. Klanjana je džezaza i onda smiraj žrtvama, nezapamćenog uništenja nevinih žrtava. Stigli su Vlasenčani iz prekookeanskih i iz zemalja Evrope da podijele tugu sa porodicom ubijenih.

Mediji su javili da je bilo oko 4.000 prisutnih dok drugi tvrde da je bilo i više. Niko se danas štedio nije da pruže pomoć jedni drugima, jer samo jedinstveni možemo dalje. Najmlađa žrtva je imala 15 godina, a najstarija 77 godina. Iste su to godine ako se gleda sposobnost za odbranu. Ovaj prvi nevini dječak nije imao snage niti umijeća da se odbrani od zlog glasa isto kao i starac nepokretan koga su zapalili u njegovoj kući. Svi komentari postaju suvišni dok jeza hvata čitavo tijelo, a jecaji guše ovo malo duše i najjednom sve staje u čovjeku. Život jeste borba, ali ne smijemo pokleknuti, valja nama dalje preko rijeke. I ovi šehidi su postali od zemlje, od praha grude njene isto kao i mi samo što su oni prije nas našli smiraj dušama svojim, a i nas će kao i njih prekriti zeleno busenje na kome će narasti mali mirišljavi poljski cvijet.

Jedno je sigurno tačno da se zlo zlim vraća, a dobro dobrim i budite ubijedeni da su žrtve našle svoj smiraj u džennetu ako Bog da, a pravda će sigurno stići sve one koji su zlo činili. Mi moramo ako Bog da dalje zbog ljubavi prema Bogu i šehidima koji proliše svoju krv za našu bolju budućnost. Džennet je jedna stvar za koju ne treba objašnjenje, ako ga zaslužiš na ovom kratkom ovozemaljskom životu.